

sondern den Worten Christi einfeltig glauben/ das wir laut seiner Wort im H. Nachtmal mit Brodt vnd Wein seinen wahren Leib vnd Blut empfangen/ vnd solches zur sterckung vnsers glaubens/ das nemlich/ so gewis wir allda den Leib vnd Blut Christi empfangen/ so gewis hab er auch für vns/ vnd für einem jeden insonderheit/ seinen Leib inn den Todt gegeben/ vnd sein Blut vergossen/ vnd vns also mit seinem Leyden vnd Sterben erlöset/ vnd vns die ewige Seligkeit erworben.

Der Papiſt
freihum / von
verwandlung
des Brods in
dem Leib
Christi.

Es haben aber die Papiſten auch groſſe Irthumb wider dieses heilige Sacrament. Denn sie sprechen/ das Brodt vnd Wein in den Leib vnd Blut Christi verwandelt werde/ daher sie das Brodt/ als Christum selber anbeten/ aber dieses ist auch Gottes Wort zuwider/ denn das Brodt vnd Wein vbleiben zwar Brodt vnd Wein/ aber mit solchem Brodt vnd Wein wird vns der Leib vnd Blut Christi warhafftig gereicht vnd gegeben. Denn das Christus spricht/ Eſſet/ das ist mein Leib/ hat nit den verstand/ dz das Brodt der Leib Christi selber sey / sondern das vns mit solchem Brodt der Leib Christi gereicht werde/ wie wir von der Tauff/ in der Tauff Christi sagen/ die ist der H. Geist/ nicht das der H. Geist eine Taub sey/ sondern das vnter der gestalt der Tauben sey der H. Geist/ also auch so ist nicht das Brodt der Leib Christi selber/ sonder vnter dem Brodt ist der Leib Christi. Daher S. Paulus. 1. Corinth. 11. solches im H. Abendmal auch nach der consecration noch ein Brodt vnd Kelch nenne/ Da er spricht/ der Mensch prüffe sich selber / vnd als dann esse er von diesem Brodt/ vnd trincke auß diesem Kelch/ damit er anzeigt / das man zwar von einem Brodt esse / vnd auß einem Kelch trincke/ aber doch mit diesem Brodt esse man den Leib Christi/ vnd mit diesem Wein im Kelch trincke man das Blut Christi/ wie dann die Wort in der Einsagung lauten/ Eſſet/ das ist mein Leib/ trincket das ist mein Blut.

Ferner so geben die Papiſten den gemeinen Menschen das H. Nachtmal allein in einer gestalt/ dz sie demselbigen den Kelch entziehen/ darwider der H. Christus außdrücklich spricht vom Kelch/ Trincket alle dar auß. Das Wortlein Alle heißt nicht allein die Priester/ sondern auch die Leuten. So sagt Paulus. 1. Corinth. 11. Der Mensch prüffe sich zuvor/ vnd als so esse er von diesem Brodt/ vnd trincke auß diesem Kelch / Er sagt/ der Mensch soll sich prüffen/ ein Mensch aber der ist nicht allein Priester/ sondern auch ein Leute/ der soll sich prüffen/ das ist/ Christlich vnd würdig sich

darzu